

煙

嶼

樓

詩

集

烟嶼樓詩集卷五

鄞 徐時棟同叔稿

慈谿葉鴻年吉甫刊

五古二

鴻年案此卷原有舟中與周茹香談經等詩六首並  
係丁酉游杭之作又他卷中有七古四首五律六首  
五排一首七律一首七言三韻一首五絕三首六言  
絕三首七絕五十二首皆已刻游杭合集集中不必牀  
牀屋屋也  
故去之

古團扇歌呈北流李觀察曉園先生

紹昉

團扇何勻圓朝朝在君側上有數行字春風銘君德

二

皎潔不可私顏色常在茲我心如團扇我心君所知

三

流螢綴高樹空庭獨徘徊承恩不可恃吁嗟秋風來

四

淒惻生長歎清白古所歡棄置復何道畱之生君寒

五

我心不可卷我心不可轉明月十五六重與君相見

舊評晚園先生曰不失溫柔敦厚之旨故佳 又曰第四章似厚反薄

庚子二月十一夜夢至阿育王寺看晉松後雨

日鏤雲扉世俊見過言新自松閒歸示我遊草

天下長松多奇絕。育王寺僧來不言松。但言佛舍利。春風知我心。吹夢到斯地。石欄點蒼苔。題句當遊記。明朝聞叩門。白髮老翁至。云自松閒歸。新詩出相示。摹寫虬枝柯。天矯有生。氣神龍。二千年人閒。尙遊戲。我久耳松名。夢松何足異。夢後翁適來。此夢如有意。當我夢松時。翁定在松際。夢中不相見。翁詩證妙諦。買棹盍往觀。松下同把臂。一笑問因緣。爲我放光未。

贈余尊訖濤

聯袂踏省門。歸來仍白衣。一片功名心。有如浮雲飛。強顏相慰藉。安用長歔歔。有客賑然笑。斯言毋乃非。人生

行樂耳得失本無端何以愛微名爲博堂上歡秋風不  
得意堂上聞長歎長歎不聞語念此心骨酸滿座聽密  
言感氣一時懾握手交問年而君已三十春暉幸舒長  
努力思報答贈君紀年詩少壯纔一睫

答何韻仙

琳

有序

庚子六月朔韻仙過烟嶼樓是夜有別客在坐縱談  
斗室客抵寢而東方白矣無何定海告警不相聞問  
者久之十月晦日韻仙忽以詩來追敘疇昔感復不  
淺十一月二十七夜挑燈獨坐環憶及之去得詩時  
又將月而久而不報殊非雅意漫成二十二韻卻寄

季夏月初吉有客臨茅茨主人出相見瀟灑無文辭  
菜羹脫粟飯濁酒盈瓦甔縱曰非高會嘉賓娛良時豪談  
雜諧笑坐久人不疲明朝客南去分手湖之麋弟兄友  
朋樂常耳安足奇飛艇震聲鼓蕩搖我邊陲旁午馳羽  
檄聞道孤城危倉黃見兵革我生尙無爲

皇威遠必屆海國鎮雄師鷹鷂逐鳥雀鷓鴣巢故枝驚  
魂乍安定而忽見君詩疇昔歡會夜一一覩縷之人生  
不知足蝸角狂奔馳把臂風雅林我俗誰能醫擊壤忘  
帝力生不遭亂離驅車忽行路道不逢嶇崎願爲太平  
民與君長遨嬉翦燭聚朋輩酒杯歡其持主飲客亦醉

新詩爲悅怡。此壽可百年。我言良弗欺。

庚子除夜朱青石

文杏

見過適余祭長恩烟嶼

樓中卽事聯句同四弟子舟

長恩主載籍文字本有靈

文杏

我亦擁萬卷與之交忘形

時棟

知爾有同嗜詩書固所馨

時棟

何物求神仙食之乃不

停

文杏

或黑如蠅背或白如魚丁

時棟

或鑽文之赤或窠簡

之青

時棟

寢饋於其中粉碎破虛冥

文杏

字字必咀嚼敗壤

先聖

時棟

甚於厄秦火殺之有餘腥

文杏

貌焉茲醜類意

亦欲

延齡胡乃不自量夢夢竟不醒

時棟

護持賴真宰震

驚如雷霆

文杏

爲文招之來歛然降我庭數其蔑經罪明

正以典刑主人長揖謝緇帙清緘局時棟永永子孫保元

然留書亭

文杏

題翁荔薈桃源問津圖

桃源在何許在我心中春苟能會其意何必問迷津怡然而自樂物我見天真羲皇尙不遠無論周與秦畫師圖勝概我知君解人豈昧寓言旨而效劉郎嚮

劉曰意興高曠絕似泉明又曰讀游杭集中靈隱詩云但得心宵開何處非蓬島及此詩起二語見吾師笥中有自然之樂又曰昔人謂太祝得陶之澹右丞得陶之清襄陽得陶之閒左司得陶之遠竊謂吾師五古得陶之真

雨夜書懷寄遠香

上山多蘭蕙下山多麋蕪采采不盈掬棄之長歎吁伊  
人我所思同心而離居不惜慷慨歌將子聽斯須

二

昔我初見子乃在湖之麋傾蓋宛生平恩愛兩不疑羽  
翼各健舉矯矯雙龍飛意氣頗深闊凌爍凡童兒

三

予弟亦俊才向子問奇字好樂和琴瑟相待如同氣況  
我連枝樹嘉子有深意結交願勿渝垂老無棄置

四

麗容女所嫉浮名人所傾余豈改前度世稱三狂生野

花滿空谷未羨凡夫名流水奏古曲未慕人間聲賦詩  
各有意焉能知我情奈何相詰責而欲強我行

五

我行不可強我志一何堅匪我心如石皎潔良自憐絕  
羣我誰與我亦心拳拳涉江訪蹇修中道忽棄捐入門  
各自媚誰能爲我言

六

吾師李太白謂曉園先生雅知我情素曉曉斯人言聞之頗  
不豫憐我平生愚前席而借箸杜甫花鴨詩款款爲我  
語黑白太分明入世眾所怒婉辭勸我行一見當如故

吁嗟騏驥心豈不欲就路伯樂忽云死躡躑不肯去

七

龍樹滿鉢水投之以一鍼欣然交契會愛我情轉深知  
我有傲骨與子重酌斟謂我旣柄鑿子兮勿商參桓伊  
吹長笛聽者豈知音去去難更卻聊用答良箴聞者忽  
相誚謂子殊古今輕身出相見與世共浮沈哀哉夫夫  
言惟我知子心

八

風波未肯息反復起更端摘我瑕與疵乃復在詩篇車  
馬不行役焉知道路艱交遊不閱歷焉知人心寒夜卧

不成寐中心多煩冤嗟哉三狂生豈不畏人言

九

驅馬出城西言從塘上遊塘上有浮萍無思亦無憂風  
來發塘上隨風東西流

十

自我與子交八載心如一予弟從子遊情明意亦密人  
言日益多光怪不可說子旣意惆悵我亦心苑結鴛鴦  
爲參商化作生離別

十一

蟋蟀鳴道周芳草萎陂澤攜手上河梁見子別時色

十二

臨別贈子言子才非庸儔意興忽然至談笑亦風流干  
戈固不遠一言生仇讐吾師昔誨我弭謗在自修自修  
苟有素人言夫何憂我則斯未能遂爲世所說持此轉  
相告痼疾會當瘳小心事友生無貽吾師羞

十三

今我住湖曲子復居山陔兩載各異地常常思光輝見  
日每苦少中心愴以摧我欲招舟子載子同來歸來日  
定相見去日不可追

十四

我家小阮賢，別我來子廬。念子不能歇，詒之尺素書。何時溪水頭，惠我雙鯉魚。白雲望不遠，相思定何如。

舊評李芥生世，滿曰烟嶼詩，往往以才氣勝。獨此十  
四章，纏綿悱惻，溫厚和平，讀之令人動伐木求友之  
思。可以怨矣。又曰：讀者且勿問其本  
事如何，但當以意逆志，使覺情生於文。

劉曰：書懷十四章，感世感身。

語意沈鬱，得漢魏之神髓。

董曰：十四詩一氣流轉，若合若離，胎息

似從白馬王篇得，淖而能不覆其貌者。

郭曰：諸作牢戾，其思玲瓏，其聲

當與阮公詠懷、陳公感遇並讀。

童曰：怨而不怒，  
妙處尤在神韻。

### 辛丑閏重三夜烟嶼樓聯句

宿雨忽新霽，東風吹夢蘇。何綠波漲春水，十洲雙好湖。

勸烟景媚人意我友其印須鳥世室邇人不遠一水歡

相呼王世裕衣稱我體步出城南隅時行行重行行道

傍多靡蕪時酒旗遠招飲買春宜玉壺琳問價斗十千

落拓高陽徒勸嘉肴列魚膾野蕪羅笋蔬世滿座發豪

興拇戰當呼盧世人生不行樂萬古亦須臾時但醉勿

復道古人今在無時暝色催游客解龜付當爐琳乘興

來烟嶼談笑聚一廬勸主人出所藏讀畫觀奇書世良

辰既不易況有同心俱世夜闌重把酌家釀非村沽時

號令忽新出鬪韻聊與娛時得句爲快意苦吟笑撚鬚

琳不得亦偶爾浮白胡爲乎勸賦詩復飲酒酒潤詩腸

枯世耀東方。不知白開窗。來奚奴世。澹詩酒。永今夕。六逸真。

可圖棟時。明當召畫師。畫成看何如。棟時

寄四弟子舟京都

湖干送別後。時夢惠連獨。慚謝康樂。無有池塘篇。或  
爲酒所苦。春來常酣眠。秋風瞬息至。擬結文字緣。亦復  
空所有。吾豈參上禪。近狀只如此。啞爾聊復言。

二

禮闈聞報罷。抑鬱誰能禁。得失本前定。何用悲升沈。唐  
人綦季通。賦詩著來今。三十名未立。謂當惜寸陰。我則  
自廢棄。望卿情轉深。努力慎自愛。姑勿起歸心。

客從都中來寄我都中書書言加餐飯堂上大歡娛客  
言弟安樂無異家中居聽客述弟事意氣猶未除科頭  
嬾見客處世無乃疏容悅固足鄙傲岸亦可虞吾言倘  
不信同好多在都試復問同好處世當何如

舊評陳餘仙曰明白如話而筆筆

轉折情至文生此境不易到也

陳曰知弟莫若兄一片婆

心兼法語巽言而出之

劉曰杜老憶弟寄弟諸詩無不悽惻動人  
以其從性情流出也吾師集中諸作亦然

哭董小峯廣文城

酒食皆知己急難無良朋交遊感君德自反吾未能斯

人未可死。雖死目不瞑。淋漓爲君哭。豈唯哀友生。

陳曰：朋友道衰，千古同慨。自反未能傾倒，語說得如許親切。他人所不肯言者，而作者言之。

二

鬼伯招君速。君去定何之。崛起如生日。未必受輪迴。茫茫九原路。遊倦應來歸。魂歸見我詩。我詩意傷悲。彭殤不足道。人言來何爲。

三

多情始多事。誤子知何因。借箸爲君畫。我言君所聞。蹉跎足可惜。彼笑奈無人。日暮倒行急。浮感徒紛紛。頑鐵鑄大錯。我亦良負君。

陳曰多情始多事閱

歷之言包括幾許

童曰真見得透切

此語吾將書諸紳

四

弱歲爲孤兒。有弟蚤不祿。地下如相逢。應作鬼聲哭。海  
邦兵塵多。夜夜聞戍角。飄然脫浩劫。焉知非君福。先墓  
構山莊。乞我文幽谷。聊慰逝者心。吾言會當復。豪氣猶  
眼前。奄忽墓草宿。誰能忘此情。不寐憂思獨。

烏曰激昂悲惋兼而有之  
多情始多事五字可傳

寒冬

寒冬草木枯。童山無佳色。遙看蹊徑多。亂似蝸行迹。重

裘禦朔風秋來常作客雲樹蒼茫中定有高人宅

劉曰寒山濯濯樵路分  
明遙看二句寫景逼肖

### 武康道中

桑林渺無際黃葉西風飄其下皆菜畦帶露新可挑少  
女攜輕筐不畏秋陽驕自我過大邑塵俗紛且囂念此  
信足樂頓覺頰襟消

自杭州至武康縣謁房師吳春岡先生

榮楷歸

### 途有作寄呈

武林百餘里一水通輕舫支港流不續纜舟樹槎枒竹  
籬蔽茅屋散淡農人家謂當入山僻而已鄰官衙更無

城與郭有市聲不譁小兒避生客道旁語啞啞民俗懷  
太古惇樸奚以加

童曰極  
似陶詩

二

山縣本凋敝年來遭薦饑今秋水大至晚禾登者稀催  
科憂政拙民力況不支報災思緩頰嚴譴安所辭咄嗟  
語未畢見彼鄉里兒上前送官牒語低躬亦卑催租急  
星火命我諄有詞下吏苦貧賤此行囊無資聞公素慨  
慷其他焉敢知

三

東脩謁門牆。愛我止之宿。歷歷承教言。夜深秉官燭。燥  
髮讀羣書。年少良卓犖。有懷經世才。志不圖干祿。一第  
作縣官。謂當抒所學。豈知磊落心。蚤已灰初服。但爲上  
官走。無爲下民牧。宦海波靡中。有吏那不俗。新來調下  
邑。公堂希敲扑。我與民兩忘。無才得清福。頗思理舊業。  
開我囊書讀。焚香掃訟庭。雖貧願亦足。

陳曰讀此詩知  
此公必非俗吏

### 丹陽道中

舍舟發林口。昧旦戒僕夫。登車續殘夢。晨露衣沾濡。征  
人怨行役。意懶心不舒。村婦畢梳洗。已下田中鋤。春風

吹枯草綠過鄰園。蔬生意淡如此。穆閣羲皇初。

車中作

薄暮車轆轤沙路村中穿。土牆黯塵色寥寂無炊烟。問我今安宿乃在岔河邊。去此尚十里心急程邈縣寒鴉啄枯木疲馬奔流泉。飢渴思飲食物我皆自然。

二

秣馬馬蹄疾脂車車輪輕可憐小兒女母死爺遠行。昔我歸自客夜夜聞啼聲。曳被強覆首悽楚那忍聽長夜不成寐悼亡悲零丁幸依大母側嬉笑忘哀情別時頗落落遠道忽怆怆苦思意若失坐看前山青。

鄒縣謁孟子廟

昔讀孟氏書。今謁孟氏廟。禮器考制度。衣冠肅瞻眺。奇井天所開。瑞木庭前繞。正氣千萬秋。微物鍾靈妙。婦孺驚鬼怪。革面崇異教。豈知無聲中。常有容光照。其旁宗子祠。歲時修鋼筆。仲子孟子子。二世列神號。核諸漢儒言。稱謂恐顛倒。孫曾與元來。名字傳焜耀。史無孟世家。世本畱管豹。宗支溯周秦。歷歷誰相詔。七篇著清議。辯難資遠到。豈無隨樂正。後先入奧窔。修明禮官責。廟制同學校。賦詩紀鄙愚。聊爲後賢告。

歸途雜詩

稅駕入旅舍。手拂塵衣。袞脫轅馬。辛苦滾地。銜柔繮。主人面如墨。缺足支板牀。脫粟難下咽。薄酒誰能嘗。去年遭大水。今年多飛蝗。頗聞山東道。比戶憂饑荒。垂髫村女兒。忽入坐我旁。自言八九歲。唱曲能侑觴。

陳曰如畫如話

陸曰廷黻甲子出都時見旅店題壁有句云行人錯認鴛鴦侶我作哀鴻一例看意亦有心人也吾師此詩意在言外更爲含蓄不盡

二

悠悠道路長。坐我一車窄。浮雲亘天際。風來淡無色。千秋萬歲名。磊落道旁石。何人下馬看。摩挲生歎息。慷慨

作期許轉瞬分。今昔我車輪。下塵皆有古人迹。

劉日詩僅六十字而吞吐山川之氣俯仰今昔之懷皆見於言外

三

老牛拖碌碌碾麥初上場。昔我北行日。田中猶未秧。迢  
遞四五月。美人天一方。卻憶去年事。鬼魅驚跳梁。燈火  
照顏色。擁被夜傍徨。水流落花去。所思焉能忘。

周日第一首時事之感第二首身世之感第三首則舍人悼亡之作也道光丙午夏秋閒忽謫傳紙人入城鳴鑼誦經比戶騷然詩中鬼魅跳梁句指此

清江驛

五月初十夜我宿清江驛倚枕不成寐明月照牀席忽

覺輾轉閒見婦好顏色。惆悵與我言欲近。不可得昔。殤周歲兒亦復在其側。嬌癡能行走。呼爺索我食歡笑。若固有焉。知幽明隔。驚起看殘燈。我身猶在客。男兒事壯遊。磊落見胸臆。瑣瑣兒女情。何爲常不釋。入夜夢見之。此情曷其極。夢中人已矣。嗟悼復何益。

郭曰神似老杜

烟嶼樓詩集卷五

男隆壽平甫校字

烟嶼樓詩集卷六

鄞 徐時棟定字稿

慈谿葉鴻年

原名刊  
維祺

五古三

李笙南

維鏞

以慎言詩見示有感而作

四座方高談我亦將有說  
猛省強制之而已在喉舌欲  
吐不敢吐欲咽不可咽  
輾轉心煩懣不覺傾情出夜卧  
良自悔曉起仍故轍何不忍須臾相期在明哲

二

結交重意氣發言誅其心  
偏強不肯服與我語相侵斯

人定豪傑久必佩良箴。或者聞吾言默默若聾。暗視色  
報無地入骨怨已深。咄嗟語扁鵲妙手無古今。入山逢  
病虎慎勿施砭鍼。

陳曰分金  
爐照妖鏡

三

古之慎言人其始必狂直慷慨陳是非奚啻拯飢溺世  
網末路多始悔吾言激箴規貽後人語語皆身歷

四

譽我雖過情暢然若自負罪我雖輕典反側尙辭咎縱  
使服無辭磊塊難消受人情不相遠卽我驗諸友

五

生少好議論於性得其蘊重冒不韙名視我皆狂奴常欲作默譜忽忽不成書昨日見君詩今日猶故吾賦此聊自勸將以返迷途慎哉口戕口前言焉可誣

陳曰莊語出以流逸閱歷之譚最足發人深省

陸曰人人意中之所欲言人人口中之所不能言讀之真覺實獲我心

童曰從自己想從對面想總見得言不可不慎非過來人不能道其隻字

無題

靈星在西北其義果何居舉座盡嘿嘿瞳目空苦思一吏忽長揖慷慨前陳辭大官動顏色燃鬚而聽之此吏

乃前白下吏非敢欺靈星在西北唯我亦不知

二

夜半叩縣門有丞登縣堂自言公事急相見神張皇夫  
男負耒耜婦女執懿筐年年二三月憐彼愚民忙何不  
休蠶績遲之天降霜此時農事畢禾稼皆登場縣官答  
縣丞公謀則既臧可惜正冬日無地采榆桑逡巡辭縣  
官長揖心怏怏叶大才不肯用此丞非尋常

三

鳴鑼戒前途綵繖高出橋道旁垂手立官府何尊嚴下  
轎謁長官長官謂我廉歸來坐飲酒食肉苦不甘有客

昏暮至對我語喃喃我笑容亦樂密室無人覘

雜詩

巢燕哺羣兒不念雛雞渴雞長燕無恩仰母聲節節萬物各自愛誰能等秦越養子需人謀生理自茲絕

二

一紙畫千人狀貌多髣髴出門行萬里所見盡區別茅檐負冬暄禪中捉蟻蝨彼亦貌不同但我不能察

劉曰末二句異想天  
開然於理實當如此

三

敗堵愁狂風何不造夏屋斗米三千錢何不食肥肉觸

熱對我語自言知心腹憂來無斷時攤我囊書讀

四

食貧意不廣鬱鬱且飲酒既醒苦酒債我爲口所誘昨日負薪子今日新太守莫怨馬前奴白雲已蒼狗

五

微風生大浪無水風無因謗書積盈篋何爲怒他人女子夜千夢不夢冠儒巾男兒夜千夢不夢嫁比鄰

六

離婁雖云明不自見顏色師曠雖云聰不自聞卧息健婦勝丈夫夜來休蠶織螳螂捕鳴蟬黃雀在其側

七

娶婦恩愛多呼媒覓新偶入門交相瘡恩愛更何有秦  
皇并六國函關不能守勿愛施旦妍誰怨無鹽醜

八

誰家窈窕子汲水贈雨師殷勤意良美道遠莫致之村  
烟自云厚上與雲爭飛浮雲蔽明月眾怨風不知

童曰莊  
列之筆

九

隋珠易兒餅失餅嬰兒啼酒徒不愛名賈客不願歸閉  
戶事述作動言知音稀生人各有欲我是人豈非

十

久居思作客。出門思故鄉。兩心互相易。可以解悲傷。出  
谷無靜雲。點水無凝霜。秉燭事夜遊。不如候晨光。

鳥曰十首皆夏夏獨造簇簇生新

忽斷忽連絕似古樂府中佳句

郭曰十首言近指遠  
深得風人比興之誼

手種鳳仙花。率爾成詠時。方與兄子隆德讀書。

崇本書院

名花不易得。得亦不易栽。手下鳳仙種。趁此梅雨來。十  
日長一尺半。月花有胎。今晨啟簾幙。紅白相開開。窈窕  
滿生意。爲爾時徘徊。

朱翁棟材話先大夫造鄞西南硤港橋時事感

泣賦謝

扁舟訪朱翁，般雞陳蔬果。酒中話舊故，勸我少安坐。澤

國田下下，貧憂富不舒。吾鄉北渡西，旱澇測尤叵。昔在

虞大夫作硤，奠洪鉞。虞光祿大甯作風朔硤事具舒信道記中水涸注江潮

雨淫洩溪沱，長川喚渡難。石橋漸堆堞，硤港三石橋。各

各小而備，納水水來遲。一杯救車火，放水水行急。覆舟

常失柁，乃公來相度。曰：此橋爲禍一橋更狹小，驚湍迅

飛箭，稻田圻龜兆。水政已叢，勝人命輕鴻。毛利害豈瑣

瑣，亟當撤去之。啟扇脫其鎖，易地而寬廣。宜在楊祠左

經始方有期諸楊持不可謂有形家言改橋不利我諸  
楊世厥居族大其人夥公乃具衣冠戶說如炙輶曰我  
改斯橋夷平化埊珂柰何惑無稽徒此煩言哆一一諾  
無詞輦石巒嗟義長虹卧江湖五門高豁聞吁嗟公此  
舉鄉邦賴安妥至今二十年不聞沈一舸世見浮梁成  
先大夫所修東津浮橋曰公眞磊砢豈知作斯橋心力更勞瘳大  
夫有遺廟即風廟附公薦果祿食德報斯人我言理豈頗  
不肖痛幼孤此時髮猶髫顯揚負楹書敢云時轍軻兄  
弟尊浮梁新薪慚負荷聽翁話先德再拜淚雙墮

陳曰此與前話舊篇後石工胡翁篇皆有闢世道之  
作若徒以頌述先德爲萌發之懷猶未知作者之用

也心

四十生日感懷一章示何韻仙馮午卿焜邵又

橋錦泉烏釀仙世耀李蓮史世濂諸子

仲冬日廿五我生黃昏後嬉戲十六年地天託高厚廿  
歲與世歲孤兒尙有母是日必祭先饋食祝兒壽嗟嗟  
今何年太歲在癸丑我年甫四十已作鮮民久月日逢  
生辰衣冠來我友揖我謂我好登堂索我酒豈不願諸  
君痛飲兩三斗嗟我餅旣罄未堪再回首

咸豐癸丑余年四十明年正月朔忽從子舟得

韻仙除夜見詒詩燈下走筆奉酬撫時感慨情

見乎詞

憶我甫少年登壇與君戲君握許城旗我拔趙家幟辛  
苦遭亂離精悍曾不異時或念及之宛如昨暮事新詩  
眼驚開歷敘舊遊地始覺初論交倏經年十四君已五  
十一我亦四十歲在昔皆後生於今不足畏我聞人有  
言人壽六旬例以比十二時一時五年計今君交戎初  
而我尾於末無聞滋益懼將弗嗟暮氣雖然我與君蒼  
蒼所位置生材必有用無用因暴棄立名與立言亦各  
視爾志勉哉學母荒晚成斯大器

郭曰固是夫子謙辭然聖賢孜孜矻矻儘有望道未  
見處讀到無用因暴棄云云如冷水澆背如熱油澆

頂夫子自待待  
友何惇篤乃爾

二

廿載謬相識雅知夷吾貧慚媿鮑公子乃無財可分歲  
晚知更急迷途猶問津我曾借前箸而惜君不聞廣廈  
庇寒士起視今何人樂道廢生計空言徒云云陋巷無  
簞瓢讀書焉養親君子亦謀食所貴不辱身

童曰至  
言可佩

三

吁嗟此何世滿地皆風波鬼蜮好顏面視人常笑呵千  
瘡而百孔力任良非他含沙忽相射我幾遭畢羅言玷

不可爲圭玷。猶可磨束脩。思斂跡。逼迫其奈何。白雲封  
靜谷。猿鳥難見過。君意殊怏怏。我羨君則多。舍己芸人  
田。望歲計已差。千秋果安在。學荒時蹉跎。因君詩言志  
我亦永吾歌。歌聲如金石。請君三摩挲。

劉曰讀此見吾師與何丈相與之厚相愛之深不是尋常酬答又曰首章我聞人有言六句極奇創二章陋巷無箠瓢四句極真熟

癸丑十一月二十五日徐十三柳泉四十生日後十  
餘日大會親朋立兄子爲後詩以話舊竝志其事凡

六十韻

何琳

憶昔歲庚子與君交始結我年卅有八君年二十七

登君烟嶼樓

君居宋月湖十洲之烟嶼故以名樓

入君神清室

君得古銅印文

曰神清之室

慕君投以詩報我句何疾我時館南湖訪我

當春日昆季敏我門高蹤不輕出縱飲復狂歌相逢

逸興發是後多往還投贈篇不一閏月記重三竹溪

追六逸朱顏皆少年圖畫肖毛髮

辛丑閏上巳君兄弟同余及陳子相

烏釀仙王稽雲出遊聯句賦詩君既作序復召良工爲之圖而趙粹甫記之

歡會無幾時

彼此悵離別西夷浮海來侵疆及吳越道路奔波中

爰爰如兔脫奉母我山居貧病兩愁絕聞君入光溪

芒屨告君實從君負米歸生死而肉骨親愛逾弟兄

此情難罄札明年掃妖氛

王師鎮旄鉞流離半載餘家園還故轍相見重相憐話

舊各嗚咽轉瞬決文戰努力錦標奪溫卿八叉詩江

郎五花筆乃遇九方歎空羣氣超軼

癸卯歲君受知於羅侍郎師以

文行竝優

秋風木犀香有弟興也勃

是歲君弟子舟與秋賦

一

第博親歡秋曹旋釋褐

乙巳子舟捷南宮觀政比部

君氣益飛揚

我亦思振拔相將同入闈相視竝奇峴君復遇賞音

我復憎命達送君赴京華獨立風瑟瑟文章不值錢

有靈向誰乞

甲辰丙午余皆薦而不得售

君亦悲喜兼空房思忽

忽

丙午秋雋後卽悼亡

下第歸去來出遊增傲拂所爭身後名

眼前甘小屋繡幙重牽絲庶士歌迨吉兒婦灌巾盂

晨昏奉甘滑乃弟既遂初承顏同繞膝

時子舟乞假南旋養親不

出悲風起令原一翼痛彫折

庚戌十月五弟覺齋逝世

臘鼓慘哀

音萱堂蔭旋失

是歲十二月八日

兄弟撫春衣慟哭線痕密

表墓揭瀧阡時在歲庚戌匆匆三年來感時尙銜恤

君年忽四旬初度仲冬月自謂荼苦餘忍聞稱觴說

願惟耿耿情嗣續竟猶缺三生而三殤空喜生如達

然雖生兒遲可先子吾姪一脈皆至親猶子何區別

作爲告廟文拜後禮秩秩酒食會親友我與賓筵列

十二月十日

達哉君所爲計亦何其決屈指十四年境

遇相髣髴君志未展舒我心多拂鬱連理四荆樹一

樹本先撥有母未能養後君同泣血科名不如君一  
子愚魯質歲歲苦食貧交謫我無術所幸六人中車  
笠非契闊詩酒尋舊盟清時祝安謚我作巴人歌不  
遑計工拙知我同心人酣歌耳當熱

郭曰道光甲辰傳璞嘗以時文就正於韻仙先生未  
讀先生詩古文也今年夏屬先生婿檢遺集將肩李  
漢之任尚未得報快讀此作情真語摯見兩先生  
相契之雅之深至於如此亟錄別紙爲之泣然

周屏厓明經球挽詩

昔我住湖西相去不盈咫三世締深交忘年誼明美高  
燭照四隅痛飲喝盧雉行樂隨少年亦豈嗟暮齒自我  
卜草堂稍稍遠城市與翁不數見偶見各歡喜春來忽

聞訃爲翁悲不已垂死猶念我我悔不一視年華旣八  
齡人壽亦可止庶幾榮孫枝門第蔚然起

山中

干戈四五年金陵久榛棘飛檄速星火滋蔓江南北兩  
浙嚴保障比戶安耕織瘡痍境外深樂土太平德告我  
道路言小捷生喜色諸君裕將才何計報

君國念無曹劇謀未敢干肉食頗聞高陽徒紛紛獻長  
策踐土戴皇天杞人憂反側不如空山中充耳無消息  
山中夜有鳥呼姑者不知其何鳥也感而賦之

我來山中宿夜夜聞鳥呼呼聲自相續聲呼其姑恐

是孝婦魂悲念姑拮据垂死不忍舍既死猶嗟吁野鳥啼姑惡性豈與梟殊詩人託歌詠薄俗何恃扶我哀此鳥鳴此鳥類孝鳥聞聲不見形不則摹其圖詎許達寢室德色見耷鋤持圖示薄俗可以人不如

山僧掘芋

山僧見我至掘芋將作羹荷鋤上山去我亦隨之行芋田縱不廣葉葉相縱橫下鋤刷烟霽剝葉披其莖僧言今夏旱芋子苦不生千錢買芋種下種以清明七月獻佛會此時當收成拔種四五十盂猶未盈新來閒月餘稍見旁芽萌九月十月交纍纍其滿畝負筐下山嘴

濯之溪水，平松枝，雜茅葦，漑釜爲我烹，嫌此味滑滑，不  
如水田，清領取，蠟殘意，斗酒聊用傾。山芋不畜，水俗名  
旱芋，固與水田芋  
異種也。

咸豐六年八月，將盡余至錫山，治先墓，憩金巖  
寺中，石工胡翁久事先大夫，夜坐寺屋爲余道  
遺訓，遂及近事，余感其意，述其言而賦之，成三

十二韻

咸豐六年秋，我來錫山，阜卜吉治，先墓，食息佛堂，右石  
工有胡翁，督役猶健，走歎息，願我言，我事先公，久公昔  
有匠事，事多成，我手聞義，公勇爲，合貲十常九，我曾願

公言生公良不偶。一揮動千金。胡不恤公後。公歎願我言。至理汝知否。我亦貧窶人。不覺積而厚。子孫而能賢。類我亦何有。不然縱多財。遺之豈能守。況我意不薄。一夫田百畝。作息事儉勤。餽粥可糊口。惜公志未竟。天不畀公壽。可憐喪心人。鑽營成利藪。窈窕讀書堂。卜築傍深柳。誦聲幾闐如。寂滅無師友。坦坦東津橋。關河作樞紐。造舟粉飾之。大木皆枯朽。謂阮士達爲柳汀義學司事。府胥徐宗岱爲甬江浮橋司事。今賴賢弟昆。一一重任受。興起曠敗餘。公靈所默誘。嗟公歸道山。昔歲當己丑。至今三十年。我亦頽白叟。見公賢子孫。於公能不負。始信公言然。太息重回首。我

歎願翁言小器如筭斗敢望我先人德量本無耦富貴  
俄頃閒變幻類雲狗惟德資久長遺訓銘戶牖翁能知  
此意庶幾言無苟爲我語鄉閭勸翁一杯酒

次韻答何大孝廉將出都中有懷徐十三舍人  
之作

慈母手中綫遊子身上衣努力期報答再拜輕別離出  
門多苦辛倚閭多苦思遊子不念母母心十二時下第  
歸去來繫船湖水涓殘冬風弗弗悲絕萊綵嬉浪跡竟  
何事悔我徒奔馳奄忽四五載春風重及期會君新得  
志奪標果不疑鴻鵠漸高舉順風翔

帝畿晚成慰初願才名無與齊我來走相送一舟門前  
羈問我行何日我心君未知待我以春仲勿愁知音稀  
送君君去矣前言吾戲之富貴豈不樂昔是今則非一  
舉名雁塔再舉身鳳池上林有全樹借我棲一枝春暉  
已無及寸草長自悲縱我行不負我亦悲無涯況復不  
如意歸來空歎歛以茲食吾諾應怪吾言欺今君亦歸  
爾相見兩依依客塵雖云惡遊人仍妙姿示我北遊集  
見君懷我詩我心漠無動君詩如見催浮名卽非願壯  
遊良亦宜征衣綫猶密君行吾當隨

童曰收得不測 又曰篇中凡作六折迴  
環如意幾忘其爲和韻之作悅服悅服

原作

何琳

飛風捲塵沙吹我遊子衣天涯望明月故人新別離  
別離分兩地一日長相思相思不能寐容顏入夢時  
昔君北遊日送君河之湄恨不偕君往著鞭同笑嬉  
迨我東裝去幽燕始驅馳因君來送我我問君行期  
君言春正月出門定不疑屈指二月盡見我於京畿  
我舟江與淮我車鄒與齊望見春明門我馬初脫羈  
念我索居日長安多故知謂宋蓮叔觀察令弟子舟比部童薇研太史今  
我來不易舉目知音稀時諸君皆歸里中日日望君至有酒  
斟酌之輪蹄駐門外謂是而竟非忽見紅杏開春色

盈鳳池羨彼年少郎翩翩高折枝

趙粹甫庶常佑宸  
盛蓉舟戶部植型

天香聞隔樹顧影殊自悲睽君四千里山巔復水涯

殘燈明旅館苦吟而歔歔平安寄君信近狀吾無欺

天街車僕僕官橋柳依依相見已不遠快覩君丰姿

話舊出西郭

時君新遷  
居城西

示君都中詩會當尋舊夢行

色春風催木天與徽省位置君竝宜知君不我棄一

鞭願追隨

白晝

白晝入都市手攫金與銀下吏自陳訴見物不見人  
蟻蝨嗜膚血口中成灰塵關國得土地耽耽來強鄰萬物

各有主。忽覺生貪。嗔但見目前者。焉知非瞽民。

二

聞昔老聃言知足自不辱。斯言到今稱我謂未超俗人。  
心無階級貪廉各有欲。勿問何日知先問何時足。旁觀  
雖了了不得曉。當局易地皆復然。誰能別清濁。

烏曰造語如諸  
子造意則勝之

童曰意則深  
奧語則洞達

烟嶼樓詩集卷六

男隆壽平甫校字

烟嶼樓詩集卷七

鄞 徐時棟同叔稿

慈谿葉鴻年吉甫刊

五古四

咸豐戊午五月有感時事賦示陳子相大令

勸

張葆宰 善元 范芾廬 邦棠 兩明經

城西十萬戶，守望遙相統。  
牛刀姑割雞，小爲梓桑用。  
三年作寓公，我亦憂患共。  
畏事聊閉門，欲抱灌園甕。  
任性昧時宜，談言未能中。  
況已覆前車，鉅創甚傷痛。  
故人知我心，知我直而贛。  
不來強逼迫，清我草堂夢。  
君材吾弗

如相較非伯仲乃聞道路言毀譽半輿誦人心之不同如面各種種遇事無小大未或免譏諷論既持短長欲亦難厭縱不因譽言喜豈爲毀言恐我心苟無瑕奚恤人言衆勉持報答心努力萬珍重

童曰沾沾計毀譽者必非有作用人

二

昔我治琴絲欲挈緒無統築室于道謀吾謀適不用臧違否是依患難則與其變故起倉卒使我幾入壘前言猶在耳不幸多言中誰與爲此禍痛定向思痛慷慨明夙心翻謂吾言贅閱感知艱難回首如昨夢今君方事

事已歷夏初。仲老馬識前途。往事爲君誦。同心事乃濟。  
去。莠。巖。非。種。以。君。舊。聲。名。接。物。婉。多。諷。不。妨。意。氣。閉。部。  
分。隨。指。縱。矧。得。素。心。人。相。恃。以。無。恐。請。君。練。達。材。三。人。  
已。成。眾。我。則。猶。戒。心。不。足。爲。君。重。

童曰此首特申明前  
篇耳兩首只如一首

徐十三舍人以感事詩見詒次韻奉答

陳 勸

承平二百年。車書大一統。士也生其間。明體貴達用。  
胞與切吾身。憂樂天下共。捍衛僅鄉里。已等天窺甕。  
袍澤詠同仇。挽強誰命中。蒿目惜時艱。撫心滋隱痛。

戲笑并怒罵不自知愚竢稍破鄙夫怪庶醒癡人夢  
豈復畏多言折檀賦將仲豈復慕鄭僑殖疇致輿誦  
舍己而芸人硯田廢耕種平生知己交一一來規諷  
謂我昧機宜謂我失操縱謂我亢有悔致福常由恐  
獲謗而招尤我寡彼口眾智小愧謀大道遠懼任重

二

昔讀樂志論我慕仲長統載披莊生言檮散安無用  
只爲念鄉井守望宜與其支廈非一木射鮒占敝甕  
慷慨談時事情弊頽切中似此切近災難忘剝膚痛  
遂致驚座名人人笑狂贛尺素忽傳來剝啄破幽夢

始知南州士寄語於陵仲箴言拜良友所願終身誦  
桃花源裏栽五柳宅邊種塵書其高閣朝夕資吟諷  
懸厓思勒馬一鞭勿輕縱行雲流水意心閑復何恐  
老氏守雌黑孔言吾從眾和衷期其濟干鈞不爲重  
前詩意有未盡疊韻復寄

鄰郡聞戒嚴鵝鷓三軍統凡有血氣者思爲國家用  
矧茲濱海邦勢如脣齒其遂使鄞西皋老圃廢抱甕  
非謂具智略十事令九中聊以固吾圉庶免瘡痍痛  
抱此區區懷才疏語復贛那知斯人心同牀各異夢  
吾黨二三子孝友推張仲直諒吾益友藥石言足誦

少伯亦奇才卓識超文種遇事相籌策微言多婉諷

謂葆宰  
芾廡

我敢執已見詭隨慮或縱不然水懦弱民玩

吾亦恐和光而同塵自詡寬得眾鄉愿非中庸畏蕙

異持重

一時舍人書來言  
將修合印泥

偶習雕蟲技日玩六書統爲之賢乎已勿使心無用

草堂況伊邇素心晨夕共我雖不善飲相邀酌春甕

古法論秦漢方員規矩中投報敵瓊瑤詎抱卞和痛

石交稱莫逆率性忘吾贛有客贈丹砂恰符吞篆夢

配以三年艾研合期夏仲吾豈忘斯言煩君爲載誦

故人良愛我用意非一種聊此代招隱免遺塵世諷  
遊藝以適性鐵筆不嫌縱善刀而藏諸懸磬有何恐  
雖有鑠金口足弭萬喙眾卽此感君意錫比百朋重  
子相以手雕私印數十方印作橫卷見詒復疊

前韻報謝

篆刻雖小道問誰別流統人人知抑塗二字見呂覽古  
人謂印泥爲塗

也祇弗虞倒用蒙君惠此卷與我賞奇其君本工六書

秃筆已盈甕時復爲印人方員矩規中嗟彼摹仿徒俗  
陋良足痛後生壞成法師心亦狂竇唯君變而通吞篆  
如有夢徐張吾不知謝山稱吾鄉先輩中徐  
啟睿張逸精篆學鐫印陳廬其伯

仲吾鄉近以印譜行世者有陳蕭樓但使不背古焉必

問倉誦謂倉頡粲然茲具陳大小非一種餘楮云俟後

題卷任譽諷需之五百年應識我豪縱世謂太慈生人

言君亦恐問我當謂何我曰吾從眾然而謔浪閒君意

則已重後五韻並用來札語意

悼宋仲穆廣文紹周殉節壽昌同子相作仍疊

前韻

王師守嚴陵軍威遙鎮統壽昌非壯縣其國武難用脣

齒藉聲援參危方與其新來忽罷兵時嚴州已固圍無

鐵囊壽昌鞭長腹不及事急謀誰中於是君誓死義憤

無城

抱深痛。從容別諸生。暮來嗟子贛。致身託宮牆。願隨兩

楹。夢聞有高子羔。

謂嚴州學高廣文

走勸下人。仲口占絕命詞。

慷慨爲之誦。嗟嗟六一翁。

君年六十一

鬢髮已種種。豈貪身

後名。豈畏後生諷。忠孝非僞爲。至性本天縱。羊質而虎  
皮。俄頃見豺恐。不見喪亂來。學校仕人眾。但有二廣文。

鼎足一時重。

謂同時殉節之松陽教諭徐清翰遂昌教諭景采臣

二

論議好昌言。雅似仲長統。平生磊落心。展材期世用。三  
年京華歸。燈火毛錐其。憔悴不得志。狂飲開春甕。朝朝  
與過從。時時聖賢中。游戲非徵逐。語言每沈痛。愛我以

箴規謂我直而贛停雲陶公詩生草謝家夢月湖卧雙

虹來往各昆仲

謂若弟蓮叔及余弟子舟

一去爲人師校士交作誦

異地懷故人如君信情種書來懶不答我爲君所諷俄

聞將挂冠追歡擬酣縱豈知六年別孤臣泣惶恐

離名惶恐

泣孤臣坡老句也

千秋萬歲名會當傳者眾我亦思誅君而豈

足輕重

### 六用韻悼其六郎

宗樂

昔君教子孫每懷仁義統立身勉無忝讀書望有用泊  
平誓死時矢與妻孥其料無覆巢下完卵大如甕嗟嗟  
垂髫郎慘遭網羅中聞之淚交流述之心惻痛兄弟相

訣別大言似狂贛六郎年十三爲賊掠去臨行謂七郎曰我在賊中稍長必當盡殺賊以報父鬼神鑒此心足醒倖生夢今閱兩月餘去時當夏仲

消息賊中斷道路無傳誦幸君多男子懋先喜有種五

子早歸來閉戶安吟諷君以多子懼累清廉先遣其長者五子歸里七郎幼

而慧遂爲賊所縱謾罵效乃翁嘯強亦無恐七郎宗臬年十一詭

言九歲賊縱之罵賊而行遂裹糧奉其母孺幼弟二妹避居山谷中忠孝固有後矧已成材眾諸郎各自愛遺德千鈞重

悼殉節宋廣文五學徐舍人見贈韻 陳 勸

儒官雖末秩實寄斯文統不幸遭時艱借才資幹用

君與壽 切齒 軍需

君父仇誓不戴天其我圍憂孔棘焦釜沃漏甕已悲世

網嬰豈畏禍機中口占廿四字字字餘深痛忠孝不

兩全吾爲王子贛倉卒聞寇至未熟黃粱夢時方晨炊紛

紛由竇高瞰瞰結纓伸罵賊不絕口道路猶傳誦嗟

哉鄭廣文鬢絲已種種臨老身陷賊徒貽後世諷君

獨明大綱好飲非任縱砥柱當中流委身風波恐如

彼大昕鼓徵之以警眾成仁君不愧一死太山重

七用韻哭及門李勤甫孝廉厚建死事東錢湖

上

廉訪自西來散漫將有統徐徐待割雞忽以牛刀用辯

疥爲癰疽戴天如不其徑入虎所穴遂至鼈居甕不幸

短命人厲氣粹然中歸元非可期覆醢吾滋痛旣懷慘

怛心亦復悲悍贛

荀子悍意好鬪似勇而非意與贛同

秋駕安可學早絕

尹需夢請纓爾終軍隱居我虞仲閉戶與世忘姑妄聽

輿誦

近日忽紛紛妄傳謂勒甫曾來見夢於余乞爲之報仇

回首嗟斯人奇才亦

雄種慷慨代父行謂免世譏諷追殺自有入指示宜發

縱柰何攘臂前恃氣而無恐徇生已可傷物議猶口眾

此爲鴻毛輕抑爲泰山重

烏曰末四語有分寸風人之旨史氏之筆

郭曰學韻諸作妥貼排纂愈出愈奇載讀和詩真所謂竝皆佳妙者也

贈朱絳山

祺

故人自光溪來向草堂宿把酒良歡欣夜深猶秉燭古  
道照人顏曾不染汚濁相交三十年肫然惟守璞吁嗟  
今何時那復舊風俗江河日夜趨雞狗相徵逐讀書解  
章句固應別庸碌所居況深山氣誼向惇樸何爲指數  
閒使我歎君獨而以斯人斯乃失泥塗足昔來卽我謀  
謂我言維服別後更加厲百悔胡可贖君歸語故交守  
身貴如玉小心事友生無爲吾黨辱

次前韻答徐曙峰

仁恩

故人和我詩遠寄隔三宿見詩知君心六府明如燭在

山泉水清出山泉水濁每懷山中人歸真完太璞入山  
當入深深山有雍俗頗聞仁里中未肯與時逐舉世任  
滔滔飽飯安碌碌地氣固云良不散嬰兒樸亦賴骨鯁  
士矯矯立於獨我思馬少游衣食取裁足所願來深山  
芒屨而野服結屋與君鄰良田爲我贖讀書課耕傭我  
亦寶吾玉不見佻達風庶幾遠恥辱

童曰此等詩和平深遠  
非專事涉獵者所知

昨以事往它山從朱絳山扇頭見徐君柳泉贈絳山  
詩讀之不禁狂喜昌黎云混混與世相濁而其心獨  
遠古人而從之徐君真其人矣主持風教砥柱中流

非君而誰歸卧山齋喜不能寐挑燈起坐次原韻卻  
寄

徐仁恩

故人城西來言就君家宿示我扇頭書向明同舉燭  
想見徐孺懷滄之不能濁精華蘊物材蒙沙而固璞  
起視人世閒相習染汚俗懷意貪狼殘乘釁瘳狗逐  
鐵中誰錚錚澗中但碌碌衣冠逞窮奇心性散惇樸  
大廈已將傾烏覩靈光獨惟君著風裁不失紅塵足  
德音結爲佩芳猷帶爲服常懼受垢汚兼金嗟莫贖  
殷勤勉交遊各貞元圃玉受賜我已多敢拜君言辱

咸豐九年五月二十三日同慈谿馮鱸鄉

廷藻

王簡侯

庸敬

同縣楊小苑

爲煥

乘轎出天童寺

至小白河頭小憩王家店遂遊阿育王寺看晉  
松及妙喜泉諸蹟步至寶幢河泛舟而歸暮抵  
草堂漫述所見示同遊諸子

夜宿天童寺曉出天童街夾道長松樹短者新培栽行  
至松盡處乃有伏虎臺野景足容與山色迎面來以山  
作門戶重重天安排竹與不設蓋看山殊復佳

二

太白山崔嵬一角割然裂

道光二十三年事近志謂寬廣百餘畝者亥也前年

傾倒處至今爲赤壁莫壽匪岡陵何故忽崩墜佛力豈

不勝忍使巨靈擘土色黃居中循名色應白物性或變  
遷白沙在泥黑何爲如丹砂力破故常格乃知造化工  
一氣通地脈吾鄉稱洞天山丹而水赤所見證所聞吾  
言非耳食

三

風來吹葛衣復去拂穉稔鄉村五月中茶市猶未罷市  
塵接隴頭誰家短牆亞倚門頌白翁相見忽前迂問我  
來何方邀我入旁舍與夫佇立聽整衣爲之下與翁昧  
平生吾意頗驚訝翁言耳盛名文章滿聲價何處曾見  
君一別十年乍行色惜匆匆不得留君駕感翁意慙慙

訪翁迨我暇。轉問翁姓名。自稱爲王稼。能作壁窠書。此鄉名藉藉。一笑別翁行。拱手向翁謝。

四

下嶺小白嶺不數里。彎環入村徑。前旬將入山道。由此中

經叶主人見重來。拍手笑而迎。野店苦不廣。坐客兩三

稱老婦。自煎茶。呼兒滌塵甌。少婦罷晨炊。梳頭開明鏡。問我十日來遊事。當已竟。客子雖倦遊。尙有看山興。

童曰野店如畫

五

行行重行行。早涼猶未已。我舟泊河濱。放去寶幢艤。招

手呼輿夫同行一時起眼界豁山川觸處生歡喜平疇  
萬頃風綠波吹瀾瀾桑柘蔭前村知有人家幾古廟紅  
粉牆中祀鬼谷子傳聞昔曾來有水硯曾洗郭璞賦新  
詩云亦曾到此闕經類荒唐一一不足恃棖觸懷先人  
來著遊山履買山費青錢地與廟鄰比擬此卜壽藏江  
河路迢遞晚歲遊錫山舍此而營彼今我偶經過先疇  
何處是回首三十年茫茫問誰氏

六

道出田中騰遙遙一山阻云是白雲山山名一何古山  
下何所有千堆萬堆土古墓無表碣縱橫間禾黍聞昔

葬王孫輝赫御碑樹。宋趙清敏公與懽葬其父忠獻公希言於白雲山下有直清乳泉二  
亭皆理借問荷鋤人。答言不知處。  
宗御書

七

遠見育王山。山亦不甚高。萬山侍左右。中處意不驕。  
天童山如抱育王山。如朝大造闢勝境。故於人意超。

鳥曰如抱如朝古今游人無不目擊而從未聞有道及之者一經拈出活現當前慧眼耶慧心耶

八

古塔臨山巔。不知瓦與鐵。此豈晉太康地中湧而出。是  
山靈異多。往往聞人說我讀。感通傳奇幻。無可詰迦葉。  
佛經過。左足跡不滅。佛跡誠難知。左右誰能別。又聞虛。

空中神光映僧七六僧去不還烏石剩僧一

卽所謂袈裟石者

同人色飛舞願往窮其實我雖不善遊頗曉看山訣大者爲名山小者爲邱垤參錯向背閒位置苦心設看山如讀書當以大綱挈數墨而尋行瑣瑣吾不屑

九

入寺恣遊覽東西已周回堂室豈不具景象殊荒頽但見舍利殿璀璨有光輝士女發歡喜以爲布施媒餘或半工作瓦石猶亂堆莎羅與拾翠

皆國朝僧晚荃所葺者晚荃於寺頗有

功詳見

古址生苔莓僧侶亦寥落三兩聊趨陪荃公已

不再璉泉焉能追始歎昨遊寺凜然清嚴規盛名本相

將副寶由人爲所可爭勝者此寺多古碑歷歷在牆壁  
磬以磚四圍不惜爲徧讀久立牆之隈持扇障烈日汗  
亦不暇揮然而堪與語片石惟宸奎坡老自書宸奎閣  
銘今尙嵌佛殿下

壁左

十

寶殿何莊嚴金鐘舍利在碑記劉薩訶千五百餘載感通  
傳劉薩訶得舍利在西京晉太康二年辛丑至今咸豐  
九年己未凡一千五百七十九年黃南雷舍利記謂洪  
武以上至薩訶歷一千九百七十九年之久者誤也計太康  
二年至洪武十二年己未宋景濂作碑時實只一千九  
百九十九年耳僧云佛慈悲色相隨人改請我試一觀會當發奇  
彩願言瞻禮之我遊今已怠長嘯出殿門此意僧不解

我欲觀晉松僧言松已矣殿門咫尺閒爲我一遙指地上蟠枯柯矯變非可擬崛強而離奇神龍沒猶視惜我來已遲眼福慳如此僧言數年來靈物固不死時見殿上嬉玉貌兩童子迹之杳難尋毋乃茯苓是吾師好神仙聞之發狂喜負鋤刷松根徧刷求形似茯苓不可得松根則傷爾其秋風雨作遂仆不能起嗟爾放光松閱人不知幾不幸遭僧父棄之如敝屣松耶亦何心誨盜而銜技遊戲幻嬰兒夫豈不容已

陳曰神龍沒  
猶視奇句

烏曰兩  
責平允

十二

天童分職守育王傳徒孫育王爲父子天童爲君臣三  
載一考績守法殊斷斷各言勤所司不知方丈尊壽松  
萬山滿枯枝許爲薪天矯老龍勢莫敢批其鱗育王專  
甲乙嘻嗃類家門主者逞所欲戒律遂紛紜神物二千  
載歛錫傷厥根坐令古奇蹟掃滅空烟雲公之享年永  
私之難久存物物理如此一松安足論

童曰育王父子天童君臣惟慧心人  
有此妙諦與上如抱如朝句同妙

陳曰末四句見道語然是儒理非禪  
理禪則諸相俱空物物安足論哉

十三

諸僧畱茶話齊邀入僧廨一僧似相識問之喟然慨自  
言本賈人貧病不能耐歎歲遭亂離告愬無門貸徧勸  
濁世情願受空王戒削髮入山中來向主僧拜逐隊學  
誦經於今忽三載豈謂此閒樂但喜無罣礙同人聞僧  
言爲之點頭再此堂號承恩戶冊班班在各詡觀

天顏後先矜寵賚逃虛而求名已忘遊方外對使碎鉢

孟宋育王僧蓮事何似僧言快

十四

客行僧欲畱餐飯云已具謝別出寺門行行復還住更

尋妙喜泉草逕雜蔬圃在昔湧大池而今絕沮洳突兀

道旁碑篆書尚如故因念二士言各各有佳趣無垢一

串穿妙喜兩頭疏

宋僧宗杲號妙喜住育王掘地得泉爲大池無垢居士張九成方守溫州

爲作妙喜泉銘有云妙喜未來泉在何處妙喜來止泉

卽發生心非泉乎泉非心乎妙喜答偈云居士恁麼妙

喜不然徐六擔板爲見一邊泉卽是我則愛無垢足刊

泉難喚作心心卽是心決定非泉妙喜誤泉隨妙喜來泉隨妙喜去謂泉非妙喜泉今在

何處是心還是泉勿參十成句我亦擔板人只向一邊悟。

十五

寺外育王嶺坦坦道不頗東去泊潮縣

嶺通鎮海縣卽宋時定海縣也

宋人呼爲泊湖縣西出寶幢河卻乘而徒步緩行堪作歌雖復不成詠時覺詩意多

十六

負。繳。行。日。中。繳。影。圓。在。地。每。經。大。樹。下。颯。爽。生。涼。意。庵  
亭。人。煮。茶。道。渴。吾。亦。憩。利。用。別。鄉。村。小。坐。問。農。器。亭。外  
見。人。家。河。干。行。且。至。買。桃。向。街。頭。沽。酒。問。村。肆。解。衣。齊  
入。船。拚。共。諸。君。醉。長。日。真。小。年。遲。遲。日。西。墜。薄。暮。歸。草  
堂。把。杯。話。遊。事。此。行。吾。不。虛。新。詩。當。遊。記。

烏曰首二句詩中畫  
畫家卻斷斷寫不出

童曰十六章以史筆作韻語或記敘或考證或議論  
或憑弔或摹寫或解悟隨步換形令讀者應接不暇

名作當與  
名山並傳

郭曰神龍在霄絳雲卷  
舒勝讀柳州山水入記

劉曰拉雜寫來語語  
實境亦語語化境

烟嶼樓詩集卷七

男隆壽平甫校字